

Il patriziat dal temp da la Veglia Republica

Furmaziun, premissas e consolidaziun, part 2

La fasa da consolidaziun dal temp da la Republica da las Trais Lias (cuntinuaziun)

A l'intern da l'elita existivan grondas differenzas tranter famiglias che sa profilavan al nivel local, regiunal e da la Republica da las Trais Lias. Las conturas da la classa superiura èn restadas diffusas era perquai che la Republica na possedeve ni in cler center da domini ni in urden corporativ basà sin il stan da naschientscha. En il rom privat sa concentravan las famiglias signurilas a transferir la pussanza guvernamentala d'ina generaziun a l'autra ed ad acquistà reputaziun e resursas materialas. Ins persequitava ina politica matrimoniala cun tendenzas a la consanguinitad, planisava la descendenza en vista ad ina divisiun da las incumbensas entaifer la famiglia sco era ad ina successiun ereditara rentabla. L'associaziun da parentella pretendeva la renunzia ad in svilup individual. Persuenter procurava la famiglia per il provediment e l'ascensiu da ses commembers en il stan secular u spiritual. Sco qualificaziuns per la carriera da notabel valevan las conuschientschas dal mund, la rutina da cumandar ed ina buna rait da relaziuns, era spirituales da padrin e madritscha. Cumbain che la carriera en uffizis era aspirabla, era l'acquist da conuschientschas professunalas giuridicas da segunda prioritad. I vegniva bain investì en la scolaziun da la giuventegna en universitads estras, ma pli impurtantas eran dimoras en curts da prinzi e servetschs mercenars. Servetschs a l'ester, carreras d'uffiziers e pensiuns n'eran per bleras famiglias betg mo necessitads finanzialas, ma servivan era ad empresar a manar e cumandar ed a s'acquistar in savair viver sco un dal mund.

En il stil da viver sa distinguevan ils nobels, ils signurs u era ils grondaners («tgaus gros», «die grossen Hansen») fitg dal pievel cumin, dals purs e dals mastergnans. Cuntrari a la parita exteriura era la posiziun dals signurs pericolitad, cunquai ch'els eran dependents da las lunas dals cumins sco gremis d'elecziun e stuevan temair las dretgiras nauschas. Las praticas limitavan il privel d'ina perdita nunspegnada da la pussanza, pretendevan dentant blers meds pecuniars per gudagnar e mantegnair la clientella persunala ed ils partisans politics. En l'optica d'observatur esters (per exempel da Giovanni Battista Padavino) eran las relaziuns grischunas perquai tumultuosas ed instablas ed ils magistrats exponids a la terrur dal pievel suveran glinatic e corruptibel. Dal tuttafatg tort n'avevan els betg.



Hortencia von Salis-Martinengo, ca. 1565.

Ils represchentants da la signuria cun ina tenuta positiva visavi l'illuminissem eran participads suenter il 1770 a moda decisiva a las stentas da modernisar las societads economicas e patrioticas. Il potenzial da la signuria republicana grischuna per la refurma interna era dentant memia pitschen per transponer politicamain ils postulats illuministics. Ella ha dentant survivì la helvetica e la mediaziun ed ha pers sia dominanza pir en ils onns 1860-80. Alura è ella s'unida – renunziand al diever public dals predicats da noblezza – cun la burgaisia purila, artisanala ed academica. Ina part considerabla da la signuria è sa retratga en il decurs dal 19avel tschientaner – cun excepziun da singuls exponentes – dal tuttafatg da la politica auta: per exempel ils Castelbergs, Monts, Latours, a Marcas (anteriura Lia Grischa), Tscharners, Travers, Pestalozzis (Lia da la Chadé), Sprechers (Lia da las Diesch Dretgiras) e Salis (Lia da la Chadé/Lia da las Diesch Dretgiras).

Adolf Collenberg

Parentella

L'istorgia da la parentella sco gruppa sociala, si'impurtanza e sia cultivaziun en l'epoca curretica n'è betg anc perscrutada. Quai ch'è perceptibel en il temp modern tempriv lascha presumar che las relaziuns da parentella e da clientella durant quest'epoca èn sa transformadas en il senn d'ina differenziaziun e structura-

ziun sociala. Impediments da maridar per motifs da parentella èn vegnids eliminads en il Grischun evangelic successivamain per trais grads. Dapi il 16avel tschientaner permetteva la baselgia la lètg cun parents da quart grad (en la lingua populara: «basret dat lètg»). A la fin da questa perioda eran permissas, sut tschertas circumstanzas, perfin lètg tranter cusrins (segund grad).

Era il diever linguistic ha midà. Entant che la noziun amicizia giugava ina rolla centrala en ils circuls persunals durant il 16avel e 17avel tschientaner, para il term collectiv parentella d'esser s'establi definitivamain en il 18avel tschientaner. Ils amis vegnivan differenziads tendenzialmain dals parents e furmavan il circul pli vast da la clientella (en la lingua populara sursilvana: «Ei dat pli bia cumpars che amigts»). In'extensiu instituziunala è resultada dal padrinadi e da la colliaziun tranter geniturs e padrins, la cumparada (cumpar/cumar). La Baselgia, ch'era competenta per la furmaziun da parentellas spiritualas, ha empruvà en la segunda mesadad dal 16avel tschientaner da fixar e da limitar il dumber da perdigas da battaisem. Las reglas stuevan adina puspè vegnir repetidas: en il Grischun evangelic aveva la Sinoda admiss tschintg padrins e madritschas da battaisem, singuls plevons vegnivan anc blier pli tard suspectads da permetter passa 20. Il Concil da Trent (terminà il 1563) permetteva als catolics mo in padrin ed ina madritscha.

L'interess per il padrinadi era general. Particularmain delicats eran scumonds d'acceptar padrinadis, sch'els pertutgavan famiglias noblas ch'avevan l'intenziun da consolidar ed amplifitgar lur alianzas da parentella cun l'agid da tals. En la populaziun purila dumandavan ins per cumpar/cumar per part persunas da l'agen milieu, per part vegnivan nuadas colliaziuns cun las elites localas. Las raits da la parentella spirituala colliavan il simpel pievel cun l'aristocrazia. In cas extrem è stà senza dubi il landamma Jakob Valär ch'è arrivà en sia vita a 583 padrinadis. Ils figliols e las figliolas pudevan sperar da survegnir regals e da vegnir protegids e promovids ed il padrin nobel u d'influenza spetgava en barat respect e loialitad (era politica). A l'intern da la noblezza sa titulavan ins da cusrin era sch'ins era mo savrin u basrin, quai che n'era betg il cas tar il pievel cumin. En ils artigels statutar davart il prender recusaziun e davart ils impediments en la tscherna da las autoritads communalas e giudizialas vegnivan ils cusrins menziunads regularmain; els valevan sco stretgs parents ed alliads (obligaziun da recusaziun tenor fatschenta). Cun la midada religiusa fundamentala e la creschientscha rasanta da

la mobilitad sociala e territoriala en ils vitgs dal Grischun han las perdunanzas pers lur impurtanza sco scuntrada da parents («far da paraints»). En ils onns 1950-70 è sa midada era la cultura da parentella tradiziunala che ha pers quasi cumpletamain sia forza da colliaziun (dal sang) e sia impegnativitad (obligaziun a la solidaritad). Dictums rumantschs en quel connex èn: «Quinaus e quinadas, nauscha bargada»; «Tgi che ha daners, ha parents»; «Allas nozzas ed alla fossa as cognoscha la parentella»; «Far oura parantellas» (passatemp da la generaziun veglia); «Esser amo paraints ourasom la cua dal giat»; «Far ün predscha da paraints».

Adolf Collenberg

Padrin e madritscha

Il padrin ha ses origin en il cristianissem tempriv: tgi che gudagnava in pajaun per la communitad cristiana daventava padrin da quel ed era qua tras responsabel per l'instrucziun religiusa dal convertit. Dapi il 5avel tschientaner remplazzan els ils geniturs en quel grà (batten, credo, instrucziun religiusa); dapi il Segund Concil vatican (1962-65) giogan els – sper ils geniturs – mo pli ina funcziun subsidiara. Las noziuns patrinus (padrin) e matrina (madritscha) existan dapi il 8avel tschientaner. Sper il padrin e la madritscha da batten èn s'establi pli tard il padrin e la madritscha da craisma. L'uffizi sez è lià a la confessiun. Las baselgas han empruvà en la segunda mesadad dal 16avel tschientaner (cun in success modest) da limitar e da fixar il dumber da padrins da batten. La Sinoda evangelica retica admetteva tschintg, singuls reverendas dentant passa 20. Als catolics eran admiss suenter il Concil da Trent (concludì il 1563) mo pli in padrin ed ina madritscha.

Per la classa dirigente eran figliols in'impurtanta clientella; els pudevan sperar da survegnir regals e giudair protezioni; il padrin nobel u pussant dentant spetgava da sia parentella spirituala respect e loialitad. In grond dumber da figliols era perquai il cas normal tar l'elita locala ch'aveva dunsainas e perfin tschientinas da figliols e figliolas (il land-

amma Jakob Valär da Fadrein per exempel aveva 583). Padrinadis eran in impurtant med per gudagnar nova clientella, crear novas alianzas famigliaras e – dapi il 19avel tschientaner causa il declin da l'aristocrazia adina pli impurtant – rinforzar ils lioms tranter la parentella da sang. Ils purs prendevan per padrins persunas da l'agen milieu u stgaffivan, sur figliols e figliolas, colliaziuns cun las elites localas. La parentella spirituala univa uschia il pievel minor cun las elites da la societad. Dal padrin e da la madritscha spetgavan (e spetgan) ins ch'els hajan quità dal figliol u da la figliola en cas da miseria u da la mort prematura dals geniturs. Gia adina han existì differenzas regionalas e socialas en la tscherna dals regals da batten (taler, brev, vestgadira e.a.), areguard lur repetiziun (anniversari, Nadal, Bumaun, maridaglia e.a.) e la recumpensa da quests regals tras ils figliols e las figliolas. Nomenclatura en connex cun padrin e madritscha: il padrin è il cumpar, la madritscha la cumar dals geniturs dal figliol u da la figliola.

In padrinadi da tempru speziala era quel tgirà entaifer las cumpagnias da mats (tradiziunalas): in commember pli vegl surpigliava la funcziun da curatur per in giuven gist recepì (sursilvan ueibel, lecher, mender); a ses curatur dueva quel durant l'emprim onn obedienscha assoluta. A chaschun da battens da recepziun formals en las cumpagnias da mats vegniva eventualmain anc tiers ina madritscha (per exempel a Ladir). Tranter ils padrinadis (impersunals) han tradiziun oravant tut quels da zains e da bandieras.

Adolf Collenberg

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Vopna da la famiglia Buol, Tavau.

FOTO: PD



Caricatura dals chaus dirigents dal temp dals Scumbigs grischuns.